

VISITE HISTORIQUE DE CUCURON PAR ELIE LÈBRE. 6° extrait

Elie Lèbre, agriculteur à Cucuron (1920-1991), a écrit et enregistré pour une émission radiophonique l'histoire et la description de notre village. Il se réfère aux ouvrages qui ont été écrits sur le sujet, notamment « Cucuron » de Maurice Taron (Luberon Nature, 1979). Le texte ci-dessous continue la visite du village en sortant de l'église.

Sortèm de la glèisa e contunham nòstra vesita en descendènt la carriera que va vèrs lo cochant en direicien dau relògi. Aquela carriera, que li dison ara « rue de l'Eglise », èra autrafés la carriera dau Marcat, a partir de la plaça de la Cabreirada qu'es a una centena de mètres de la glèisa. A la debuta de la carriera a gaucha es l'ancian presbitari que siguèt reparat amé lei pèiras de la vièlha glèisa de Sant Michèu. En faci, en plaça dei dos premiers ostaus, i avié l'ospici que restèt aquí de 1596 a 1660. Siguèt remplaçat pèr aqueu de ara qu'es au levant de la glèisa. Actualament lo presbitari se tròva a n aquel endrech.

Avans d'arrivar sus la plaça de la Cabreirada, remarcaretz sus la gaucha un bèl ostau. Es dau siècle des-e-seten ; es estat bastit pèr un membre de la familha de Bouliers, qu'èron senhors de Vaugina, e de pron d'autreis endrechs dins leis alentorns. Au siècle passat, lei Fraires deis Escòlas crestianas tenien aquí una escòla. **Siguèt sarrada** en 1905 a la separacion de la Glèisa e de l'Estat. Lo bastiment devenguèt comunau. A l'ora d'ara **assosta** un musèu d'arqueologié e d'istòri locala creat en 1970 que vau la pena de l'anar vesitar. En faci s'es estalat un atalhier de potarié, e **la cròta** qu'es au fons èra un molin d'òli qu'es interessant a vèire.

Arrivam après sus la plaça de la Cabreirada. Au fons de la plaça i avié de cròtas qu'èron dau senhor. Aquí i avié un forn em'un molin d'òli que marchava encara a la guèrra de 14. Lo nom de Cabreirada vèn que èra sus aquela plaça que **recampavon totei lei cabras** dau vilagi. Un pastre comunau leis anava gardar, e lo soar chascun venié cercar lei sieunas.

Vocabulaire

Siguèt sarrada : fut fermée

Assosta : abrite

la cròta : la grotte

recampavon totei lei cabras : ils rassemblaient toutes les chèvres